

四庫全書

集部

欽定四庫全書

宛陵羣英集卷八

元汪澤民張師愚同編

今體

七言律

元

陳良弼

題潭州李安撫祠堂

一木能支大厦傾
忍聞垓下楚歌聲
要令闔室忠王事
肯使降書入帝城
科目有人名不朽
祠堂畫像面如生

勢危大節方能見千載流芳在史評

梅德明

送郡幕傅經歷

三年主畫向陵陽更覺蕭然兩鬢蒼
審象幾時求傳說為郎從昔老馮唐
柳枝歌斷山盃盡梅雨晴來江路長
未得還家問松菊黃金臺上看翱翔

送劉石泉

青藜家學子能傳五載橫經得舊瓊
屢喜鶚書登粉署

會看鵬翼奮青天玉山未許成真隱
宛水先拚醉別筵
若過西湖訪陳迹梅花未落待吟韉

胡寬

送麻居靜尊師往武林三茅觀

早侍珠庭預祝釐清光咫尺不相違
露杯數賜金僊掌
霞斨初裁玉女機紫詔從天龍護去
白雲移海鶴辭歸
希夷真契仙喬侶菲薄無因便拂衣

送族弟孝立往上京

金
卷八
扈驛蕭蕭萬馬嚴雲光草色碧相粘暫韜彩筆高吟輟
初挽雕弓勁力添野次障開紅罽毯晨餐盤進水精鹽
少年亦愛從軍樂今日才名況汝兼

潘如瑗

移居黃冲

西岡西畔翠藤遮石徑斑斑帶蘚花閒客敲門來看竹
小童掃葉為煎茶張琴松下風聲細讀易梅邊月影斜
潘閨愛山曾入畫聞孫此日又移家

潘泰之

壽憲司楊志行照磨

臘容春意正駸駸誰道陽和散涸陰豈但子雲能識字
固應伯起解辭金官居庭戶清逾厲筆底文章思轉深
且向梅邊斟壽酒枝南枝北總無心

和錄事吳正傳登景德寺閣韻

按宣城縣志作開元寺閣

上國大賢吳季子風流非復舊潘郎君詩秋色同蕭洒
我興滄州空渺茫宦海才名雖異調騷人曾次豈殊鄉

三生杜牧今何處
眼冷禪林木葉黃

詩意

慘淡經營似畫圖
神遊物外有還無
灞橋雪裏情應苦
飯顆山頭人亦癯
敏掣鯨魚當碧海
幽隨象罔索玄珠
出塵解悟天機妙
一字何勞撚斷鬚

潘復之

送高羅谷之荆湖德安府教授

谷澗何須賦考槃
明時未覺道行難
黃雞白酒南陵別

華髮青衫博士官，羣彥正思沾化雨。丈夫豈信悞儒冠，
謫仙舊隱遺蹤在巖畔。碧桃誰共看。

貢士源

送李行甫任南雄教授

江上春風帶雪寒，沙頭雙玉酒頻乾。廣文官舍誰言冷，
客子青山不厭看。煙浦泊船盧橘熟，晴林倚杖荔枝丹。
遠鄉珍味殷勤致，壽母佳兒兩地安。

貢士濬

挽劉景南

卜鄰長傍舊山村水滿新塘月滿門嗜學不須營利祿
藏書何用廣田園人生已過八旬壽祖訓無慚九世孫

原注侍御
九世孫

明日黃花秋寂寞露叢猶自泣吟魂

趙孟禧

餞林景嘉

萬山深處枉吟鞭珍重東山雁字傳握手秋風新句裏
論心夜雨短檠邊使秦豈覲黃金贈歸趙難求白璧全

腸斷陽關留不住江閩相望隔雲煙

胡晉

送成經歷之西臺御史

醞藉襟懷夢澤寬每欣倒屣罄交歡暫依江左芙蓉幕
又着關西獬豸冠霜鶚縱翰風力峻玉驄持勒雪花乾
從來內輔須臺閣會看班列陞端

汪珍

壽殿幹叔祖

絳榴花下紫綸巾笑問銅人五百春再數行年從丙午
別參內景守庚申世間萬戶詩無敵天上三星箕有神
造化當今公老壽壁中科斗誦先秦

次程子英金陵懷古韻

桃葉桃根樂府詞江南千里舊封畿黃旗紫蓋關興廢
東府西州有是非故苑半隨秋草沒征帆猶趁暮潮歸
搖鞭奪得蛇矛斷夢破重營遶日暉

送族叔平仲赴都謁選

詔出如綸士氣張行應辟命稱材良從來筆下波瀾濶
合近天邊雨露香漢水彭城形勝在燕花薊月道途長
萬金信好君須寄最是高堂念有方

迂廬疎齋肅政使

去年幕府雪晴時誦得蘼辛絕妙詞溪樹迎人寒欲醒
春陽行處本無私輪埋當道豺狼避月到空山颺颺移
白髮遺民思舊德相看繡斧重褰帷

登宣城

欽定四庫全書

卷八

夜炊芋火厭鹹腥曉困差便卯酒醒雲雨弄晴翻覆手
山川送客短長亭天涯歲晚思田畝原上風寒賦鵲鵲
明日歸程好行色梅花春小麥痕青

貢奎

送師道姪赴太常奉禮并寄勉師泰

江浦風帆拂翠微宦情日日去如飛容臺畫靜花明佩
玉禁春深柳染衣隨直定知車北上思親莫忘雁南歸
青雲故友應相問為說烟蓑老釣磯

四月含桃喜薦新
紫衣贊禮屬芳辰
官稱猶是青氈物
老大潛驚白髮人
客以蘼鹽憐汝弟
病多藥石愧吾身
小牕風月連牀夜
記取挑燈莫厭頻

惠安橋

潯陽山水壯南州
千尺飛梁速去郵
蛟鰐翻波聲吼夜
虹蜺分雨氣橫秋
險疑雲棧通車馬
高比銀河挾女牛
鉅萬功成書太史
絕勝舟楫濟中流

饒王敬叔

一年湖海一尊同醉裏那知鬢欲翁投轄不緣今日雨
論文未減昔人風春隨流水三分盡酒重交情百罰空
莫道雙溪堪舉棹片雲來徃敬亭東

送胡則大赴宣州學正

小謝樓高宛句傍一瓊分坐任淒涼休如鄭老嗟官舍
好似并州作故鄉俸薄儘供妻子累身閒不受簡書忙
評詩應到城南宅千樹春風雪正香

通州道中

萬雉參差雲霧開
四千里外客重來
平岡日出車牛喘
古道塵飛驛騎回
白玉至今傳楚璞
黃金自古說燕臺
高樓紅旆應如昨
莫遣新愁到酒盃

寄張芳洲

客裏秋風厭道途
歸來決策侶樵漁
知心白石煙霞在
滿眼青山故舊疎
畏熱還思親枕簟
愛閒應愧負琴書
麻姑池上花如錦
何日相過駕短車

送謝明遠之官平江

碧波千頃照姑蘇
目送危檣數幅蒲
古寺雲遮丘卧虎
荒臺葉落夜啼烏
黑頭清鏡來勲業
綠幕深衣入畫圖
暇日過游新得句
秋風應寄故山廬

杜仲悅知事庭桂產芝

庭桂婆娑更老蒼
秋風忽見紫芝房
九莖同作月中影
一樹交浮雲外香
飢茹未輸商四皓
芳傳應比竇諸郎
寄生不似凌霄蔓
空附喬松百尺強

送汪叔志之南安

繞郭清溪帶路長，衝寒極目送危樑。
水涯梅柳傳春信，雪後樓臺照夕陽。
杜牧吟邊山鳥去，謝公行處石苔蒼。
碧雲暮合天無際，回首相思欲斷腸。

久留翰院思歸

日日思歸未有期，夢魂幾度遶園池。
白雲滿地山深處，紅日當檐雪霽時。
竹外板輿春步小，花間銀燭夜筵遲。
好將烏鵲頻占喜，便買歸舟泛碧漪。

郊行

馬上看山山不盡客中行路路偏長叢祠社散羣鳥啄
層漢秋高數雁翔踈雨着人絺袖濕微風吹面稻花香
迴途偶憩幽塘上顛倒松陰百尺強

梅致和劉有之過雙溪書塾值余歸省及門而
返次日以詩見贈用韻奉答

先生氣節抗浮雲日糴真同鄭廣文要結溪邊鷗鷺約
豈期雲外燕鴻分籃輿興盡中途返梅雪香清隔岸聞
珍重詩筒頻寄我明當授粲謝殷勤

和答劉有之韻

寄跡南岡四十年平生書榻膝曾穿
驂騑正待王良御杞梓寧期匠石捐
揮麈春風長滿座窮經白雪已盈顛
弊裘典盡囊羞澁猶向隣家貸酒錢

汪叔震和張貫道詩見寄次韻答之

貴介爭營翠釜駝何如章甫聳峩峩
空堦黃葉秋聲早殘卷青燈夜雨多
賴有新知傾管鮑愧無佳句敵陰何
功名未遂秋生鬢空對長天慷慨歌

張師愚

送王公中之浙東

江左當年屢辟除，濯纓何事久躊躇。
求才喜用衡門士，應幕今從帥府書。
海賈舟帆來貨貝，越民耕稼雜鹽漁。
元戎坐鎮東南境，贊畫如君定有餘。

送陶子源巡檢之桂陽

輶弓南適桂陽城，武事還資藝苑英。
地遠夷徭皆向化，時清桴鼓不須鳴。
壇山積翠餘仙迹，湟水飛湍想漢兵。

到日登臨成勝賞好將風景寄吟情

送趙耕道

宛溪霜曉送歸棹試倒清樽話別離解纜仍歌竹枝曲
過家不負菊花期肯嫌鄧禹為官冷會見常何獻策奇
况是交遊滿臺省青雲要路莫遲遲

送谷仲舉為南臺掾

當年捧檄謝公城利器清才數俊英簡牘重來參幕畫
風霜今起贊臺評隱之酌水心寧易子夏彈琴聲未成

從此飛騰我豸角應思松栢不勝情

和姚竹居過趙忠定公故宅詩韻

翊戴功成賴屏翰豈知螻螳困泥蟠南荒地遠勞行役
北闕雲深欲見難納冊未占風拔木懷沙先見畹滋蘭
惟公千古精忠在奸黨何殊一鼠肝

挽貢仲章學士

妙年稽古著華纓晚歲蓬山益擅名太室恭祠司大禮
九重讀卷擢羣英燎熏嶽鎮風塵靜歸卧雲林羽翼生

東望新阡氣蔥鬱悲涼空寄薤歌聲

送方嘉父

連城自許敵璫璣湖海飄零氣不殊
薄宦真如蕉覆鹿言歸豈為食無魚
青雲交友思推轂白髮慈親正倚閭
谷口躬耕固云樂祇應非晚有除書

送趙明仲

珊瑚文彩照華年宛水逢君亦偶然
季琰能書有家法袁宏詠史動隣船
清才瀟灑方題柱窮巷栖遲獨守玄

談笑相看還遽別想隨春雁北遊燕

送馬彥卿

相逢一笑即相忘況是黷宮六月涼解榻正依松桂影
看書共挹芰荷香闌干鍾乳生金鼎磊落驪珠滿錦囊
歸去重來知幾日貂裘應拂敬亭霜

送趙伯淵

送遠臨歧別緒長少留吹帽醉重陽秦淮倚棹秋聽雨
易水驅車曉度霜吳祐肯成青竹簡謝玄不佩紫羅囊

熟知二父才名盛素業承家未易量

送郭右司

握蘭冠豸聳班行却賦閒居與世忘
賈誼還聞召宣室
舜欽那得老滄浪
紫泥朝捧馳星夜
青瑣春催拜夕郎
見說羣賢方進用好將勲業佐時康

張師魯

送嵎縣宰

儒將開藩宛水濱後人分蔭繼光塵
遷官勾越垂朱紱

樹表瀧岡勒翠珉山護松楸顏色喜邑栽桃李物華新
公餘何以銷閒日筆底龍蛇要逼真

送俞槐澗歸上饒

傾蓋逢君如素知廣文分羶聊自怡彩虹明鏡足吟嘯
冰水玉山形夢思客裏無金意慷慨囊中有書光陸離
明年八月會相見食葉春蠶文益奇

謁昭亭祠

至元辛巳立春日陪公亮從舅謁欸祠下獲

吉徵其繇曰魚透龍門身離塵遂飲福胡氏

分韻得龍字

上到昭亭第一峯雲梯躡遍翠重重廟前綵仗來春騎
殿上香煙繞袞龍暖轉新陽浮宿草凍擎殘雪挺喬松
良辰共喜蒙靈貺拂面東風酒興濃

題忠諫四御史詩卷

敢論佛骨吐長虹四子相期感帝聰視死猶歸真不忝
有心如面豈非忠臺端風采誰能繼史牒芬芳獨未窮

天意終回頌雨露直臣昭雪沒存同

王虎臣

寄周千之

予昔作掾潛川千之每作遨頭追想昔遊之
樂且恨千之之間闊詩以寄贈

岑巖金鷲翠作峯登臨長憶與君同窮探洞穴驚山鬼
淺揭溪流怯射工四海交遊雲聚散百年踪跡路西東
詩盟到老堅如石莫遣音書似斷蓬

閒居寄吳子彥

插柳栽花足自娛
老來無力事樵蘇
生無鮑叔家常困
死有山公子不孤
花落忽驚聞謝豹
囊空何忍殺青蚶
貧居莫道渾蕭索
客至松醪免去沽

送陳公輔之新寧邑

五柳從渠並舍垂
雙鳬自向武岡飛
宦情未許霜侵鬢
草色行看綠上衣
野興催詩鷗鳥近
溪鮮入饌鰕魚肥
敬亭後夜相思處
林下唯瞻列宿輝

鼠鬚筆

維鼠穿窬以竊名來親筆硯豈無心幾年俛首潛蓬華
一日掀髯入翰林湯沐已曾霑聖澤文章未見出徽音
自知不是中山族秉用徒慙眷遇深

凌希惠

挽陳公輔縣宰

清標出俗世稱賢宦轍江湖四十年才似張華能博物
官同陶令便歸田青山葬地生前定縹帙遺書沒後傳

遼鶴不來天地老玉簫吹斷魯溪煙

挽崔芝庭

鼓篋升堂與俊髦當年有志在雲霄看書得趣忘漂麥
夢鹿迷踪漫覆蕉忽報遣車從畫翣但留遺藁滿詩瓢
眼中耆舊凋零盡腸斷西風楚些招

挽羅德秀

傾蓋相逢三十年幾同燈火勘丹鉛凌雲自負相如賦
分菴人知蔡順賢講席方欣占崔冠夜臺何遽合龍泉

儀刑未遠遺芳在一酌清觴為泣然

汪士深

題景德寺

寺占陵陽第一峯
寶扉珠樹碧玲瓏
鶴巢霄漢浮圖頂
僧舍煙霞丈室中
高閣鐘聲聞遠近
上方燈影徹西東
一從杜牧題詩後
翰墨誰能繼古風

齋居遣興答施晉卿

百年襟抱着悲歡
晚節從容任考槃
白髮已從公道得

青山長似故人看經時積雨開新霽出色秋花耐曉寒
欲寄新詩無別恨目隨征雁楚江干

汪士明

遊木瓜園

木瓜名品擅江東三月花開煙雨中十里明霞紅步障
數峯春色錦屏風壓枝絳蠟融成蒂映地珊瑚矮作叢
秋實勝如丹頰美更期躍馬訪園翁

欽定四庫全書

卷八

欽定四庫全書

宛陵羣英集卷九

元汪澤民張師愚同編

今體

七言律

元

汪澤民

敬用龍溪公次南安軍詩韻寄仲芳兄

十年江漢等萍浮為客漁城麥入秋
塵事滿襟寬帶眼
微官何物誤刀頭
春懷花樹宗家會
夢遶松楸故里愁

暖翠晴嵐佳句在淒涼先哲此曾遊

上元侍慈親家宴

春風燈火客吳閭時雨新晴夜未央門外十分明月色
堂中一點壽星光傳柑節序隨緣賞奕葉孫曾衍慶長
況是聖朝新孝治金華早晚拜恩章

送胡伯恭赴婺源州任判官遂有先墓之託

一溪環郭萬峰奇隣壤圖經豈待披邑戶采金歸禹貢
蠻商懷貝謁蕭祠先聲警俗山無盜後日尋春卷有詩

松栢城南托京兆宗元聊解故鄉思

贈王道寧憲使遷浙東

司憲曾臨列棘中賓賢堂上挹清風幾回車笠逢江左
一日囊衣向浙東士借才名勞案牘人思德化活疲癯
欲知別後懸情處明月相思兩地同

壽王秋崖萬戶

胷次何論百萬兵剖符作鎮宛溪城三軍部曲魚麗整
十載溪山虎落清定遠從來食肉相祭遵不忘雅歌聲

稱觴歲歲流觴後有酒如澠樂太平

送耿左丞赴中臺侍御

原註時督漕在姑蘇

左轄官崇聳附蟬暫分南省此旬宣黃封雨露來天上
白筆風霜近日邊賜祿未容闕宋璟明經方欲相韋賢
還朝端慰蒼生望敢向楓橋惜別筵

送孔用道山東副使

千里星軺不可攀離筵空自疊陽關步趨方接護龍上
政教初興齊魯間鄉國誰非驄馬貴君侯真著繡衣還

高樓別後偏凝佇
覆野春雲起泰山

送方嘉父臨江覲省

簾雲宜食玉山禾
十載江湖尚轆轤
漫說平生不龜手
誰聽中夜飯牛歌
高堂正欲調親膳
壯齒寧容隱釣蓑
膳采黃花須盡醉
清秋無奈別離多

和楊侍郎輦下書事韻

曾看長安陌上花
萬方人物仰皇家
龍門變化風雷夕
鳳闕瞻依日月華
曉色宮槐連御柳
春聲疊鼓帶凝笳

聞君高詠燕山雪三復新章絢彩霞

挽貢仲堅

秀野園亭景四圍南湖風月賞無違
明經不待彈冠薦采菊旋思解綬歸
梧櫟霜寒嗟拱木蘭蓀春暖謁餘耆
高年厚福公何憾空想先塵淚洒衣

挽王相伯

尚憶通家談往事齋廬燈火每忘年
居依李愿歸盤谷圖似王維在輞川
衿佩楷模懷化雨衣冠耆舊隔重泉

從來為善多餘福看取孫曾不乏賢

挽趙陽山

早歲科名摘領髭振振麟趾冠當時故侯甘隱青門老
輿尉寧知絳縣師書帶草生人自遠山鞠窮盡疾難治
原注鞠起弓反山
鞠窮乃禦濕之藥弓裘有子應無憾獨憶通家涕泗垂

挽王敬叔

薦書纔上海塵揚南郭逍遙與世忘摩詰平生詩可畫
無功晚節醉為鄉驚聞佳士逢蛇影愁絕難兄失鴈行

漢史何人書獨行銘文三復涕霑裳

代挽楊桂巖

門外空迴長者車
草玄論字總何如
秋當鴻鴈傳書後
歲在龍蛇入夢初
諼背東風留綵服
瓜廬夜雨憶春鋤
山陽笛裏無窮恨
滿目寒雲淚洒裾

竹庵居士風鑒精深
賓興未行時深以榮名相期
予未之信已而果預科目
相別五年遠訪予
于昌江賦詩贈之

綠髮相看十載前，談王端欲老林泉。
君言明逸終當貴，我恨希夷不許仙。
幸折桂枝符舊約，喜培萱草得長年。
春風握手昌江上，一笑蘼鹽有夙緣。

挽師炳仲二首

清標逸氣獨飄飄，束髮耽書但一瓢。
初說御觴蛇作祟，忽聞占讖鵬為妖。
承家舊業誰堪付，隔世遊魂不可招。
寂寞華陽正丘首，文場從此亦蕭條。

還往吾廬經七十，興懷樂事意茫然。
秋風吹帽南峯上，

夜雨連床宛水邊交臂偶成千里役修文遽隔九重泉
題詩一灑無從涕空想聲容閣舊篇

貢萬里

按萬里官
嘉興教諭

次九萬兄九日詩韻

身閒贏得細看萸何況秋來一事無粟里田園多種秫
鑑湖風月不收租瘦吟幾度寬衣帶醉舞有時敲唾壺
只此生涯雖冷淡也教佳節不虛拘

重陽即事呈隆山先生

蕭蕭風雨重陽節渺渺江山萬里天子美登臺曾有句
淵明對菊偶無錢升沉未用論時命聚散因嗟歷歲年
倦倚闌干數歸鳥相思却寄碧雲篇

胡則大歸自京都仲章有詩見貽次韻

虞彥歌罷客歸來昨夜燈花信可猜草色幾牽游子恨
柴扉重與故人開九霄雲路南鵬舉萬里鄉心蜀鳥催
莫學并州窮賈島杖藜湖上暫徘徊

汪用敬

送楊好古泐東憲掾

才思飄飄迥不羈
青年高步際明時
黃堂雅望推三語
烏府先聲重四知
石室嵐煙凝紫翠
蘭溪梅雨漲漣漪
公餘想遂登臨興
好把新吟慰我思

拜雙澗祖墓

瞻望松楸四十年
茲辰拜掃獨悽然
黃花紅紫孤坑路
冷雨淒風九月天
幸續烝嘗歸舊業
冀傳簪笏仰前賢
清觴一奠抒誠敬
回首華峯晚翠連

張知言

案知言字公
先師愚次子

上御史二首

英英清譽冠羣才，豸角戎冠向此來。
丹桂當年分兔窟，繡衣今日照烏臺。
霜飛南國炎氛靖，霧歛澄江霽景開。
豈但乘驄司六察，會看補袞上三台。

分振臺綱下鷺車，文章勲業見真儒。
春風已驟看花馬，朝彩還吟借樹烏。
霜氣稜稜飛白簡，月華皎皎映冰壺。
九重正爾思賢切，宜有嘉猷贊廟謨。

壽施氏子芳

卜築東郊久避喧青雲無意在騰騫
花園錦繡春生座
水引漣漪綠映門芳遠題詩延上客
巢林傳業見聞孫
華筵稱壽端陽近蒲醕浮香滿玉樽

施琪

次丁志道憲使迎詔韻二首

驛使傳宣到謝城羣公聯轡出郊行
芝泥恩重春風暖
柏府雲開曉日晴禮樂光華逢聖治
衣冠鼓舞慶文明

從知寰宇多生意隨地欣欣草木榮

一從跋扈竄邊城王政班班次第行每聽絲綸傳好語
正如鐘鼓報新晴九天胥慶風雲會萬國咸瞻日月明
江左幕賓陪繡使侵晨迎詔沐恩榮

送吳巡檢

發弓箠矢發征鞍元是青衫一冷官鷄犬不驚桴鼓靜
狐狸屏跡里閭安縱遲萬里雲霄路還勝三年苜蓿盤
去去桐川動詩興梅含椒萼雪初乾

梅致和

壽憲使繼學王公

疊嶂清風凜凜寒繡衣於此偶躋攀宦名不在姚廬下
詩律仍居李謝間青史奇勲傳聖代丹砂秘訣駐仙顏
九重政爾思賢佐催覲芝封指日頒

挽叔章兄

壯年負笈旅京華芹泮花封屢及瓜陶令到官尋解篆
潘郎奉母自扶車支宗共出南昌譜貧族常依北阮家

賴有佳兒追李密時於堂上奉萱花

何儒行

送任廉使由浙東除浙西

雙溪秋色敬亭雲三十年前此奉親

原注任父嘗為本郡推官馬馬

高車陰德厚繡衣玉節使華新月移江國無私照雨入
吳鄉有脚春正為皇家念民瘼重煩原隰徧咨詢

上廉使繼學王公

姓字凌烟煥古今江東欣覩使星臨文章兩漢諸儒右

忠孝孤臣萬里心
玉節繡衣新命重
黃扉紫閣舊恩深
定知調鼎思賢佐
早晚天風下玉音

送谷仲臯之江浙理問知事

舊聞臺憲慣遊遨
又見中書簡俊髦
秋水芙蓉賓幕靜
春風芍藥省垣高
光分謝朓樓前月
寒捲錢王海上濤
公望直須我豸角
九霄蒼隼見秋毫

贈陳玉林鍊師

玉林自集慶歸鼇峯
為其師毛月湖稱壽臨

別賦詩送之時江東經歷李之寅為南臺御史故詩末及之

歸來明月滿湖天
雪霽鰲峯玉樹鮮
曾是飛龍亭上客
却為騎鶴洞中仙
莊周已悟生虛白
揚子猶能草太玄
若見隴西驄馬使
為言踪跡尚林泉

送賈廉使赴左司郎中

一道澄清政不寬
何如四海沐公恩
風霜筆底秋凌烈
雲夢胸中氣吐吞
教雨欲霑丹桂籍
文星先入紫微垣

傳家況有治安策佇看陽和轉化元

送史郎中滿任

麒麟勲業煥丹青又見猗蘭奕葉馨真定衣冠推閥閱
陵陽風月入簾簾桑麻千里霑春雨溪嶂三年覩景星
贏得清名騰栢府翩翩一鶚上秋冥

清明前一日施敬叔約遊廣教寺

按宣城縣志作永慶寺

澄江西畔扣禪扃暖日聯鑣趁踏青茂樹清泉丞相宅
閒雲飛鳥謫仙亭山中不雨花常潤林下無人蘭自馨

醉後摩挲庭外碣風霜杉檜幾朝經

劉得之

寄貢道甫奉禮

花容柳色表芳春宛句溪邊一揖分我似白鷗耽狎水
君如黃鵠健摩雲曲臺攷禮多從漢清廟登歌屢祀文
班列奉常元自好龍旂時見亦欣欣

壽魏察判

遠屋園亭只種花貞元朝士老煙霞清秋簾幙謝公郡

舊日衣冠魏相家樓對青山浮大白雲深碧洞飯胡麻
長生有訣元曾用須信于今鬢未華

春分前十日和貢南漪韻

索笑梅簷日未曛詩來滿紙走煙雲寒收蟄戶雷初動
暖入花房春又分白髮數莖明鏡影黃庭一卷對爐芬
老來真羨湖山好混迹漁樵意所欣

松棚

碧玉釵寒嶺上枝分枝結架傍軒墀綠雲當戶何曾動

赤日騰空了不知三伏自疑秋氣早五更偏訝曙光遲
清陰未必家家有兀坐令人有所思

貢師泰

題天台道士李東柯卷

翠蛟青鳳下崆峒家住天台第幾峯歲久松肪成琥珀
夜深丹氣出芙蓉仙童奏簡騎文虎太乙懸旗畫絳龍

昨日從師到天上故山還著白雲封

原注東柯常從天
師赴京都故及之

挽陳公輔

髭髭垂經寄遺孤自立聲名重里閭座上鼎彝前代器
篋中經史外家書縣花春老初封印庭藥秋慵久廢鋤
惆悵冰壺清絕處露寒應是泣蟾蜍

次泗安芝上人韻

水氣朝寒散白烟寺前楊柳繫吳船佛燈紅隱流蘇座
僧衲青裁海艾氊書報誤叨金馬召厨空應愧木魚懸
定知別後相思處楓葉蘆花宛句邊

題江陰君山和陸子方韻

畫橋垂柳傍官壕
隔岸青山似湧濤
楚相丘墟埋石馬
梵王宮殿壓金鼇
天低鴻鴈江流濶
風撼魚龍海氣高
聞說城南有真逸
烟蓑還許伴漁舠

送賈有恒赴潞城縣令

上黨人參五葉齊
郎君春日馬行西
滿溪藍水魚初上
繞縣青山鶯亂啼
小吏報籌衙欲退
長官收印手還題
洛陽自古多才思
好賦新詩寫赫蹄

劉鑄

遊隱靜寺

飛磴盤雲入梵天五峯深翠削青蓮
鳴泉似說梁朝事醜石曾聞杯渡禪
饑虎嘯林巖際宿老猿啼月樹頭懸
我來為愛山中靜徹夜松聲惱醉眠

劉錫

按錫字禹疇鏞弟有慶次子以蔭授江夏尉調弋陽主簿後用王嘉薦歷寧國推官

上左丞

早握兵衡晚廟堂虎符珠顆祭龍章
賜衣新被乾坤澤衛駕親承日月光
耿耿丹心依北闕堂堂素節鎮南荒

書生敢恃宗盟舊引領天風為發揚

趙次鈺

案次鈺字仲相

次吳間閒送張玄谷提點韻

仗劍驅雷雨沛然清都法自祖師傳曾乘白鶴三千里
入覲飛龍尺五天羽服星冠承寵渥玉函瓊笈護靈編
恭惟聖主當乾運永賴調元奏萬年

郭雷煥

案雷煥字有章饒州路教授能詩尤工駢麗文時謂之郭四六

賀趙子昂初應召北上

錦繡心胸玉雪姿偉人一出應明時南邦諸老歌麟趾
北闕千官看鳳儀家世不隨陵谷變才名今動帝王知
正須箕子陳洪範豈但羲之翰墨奇

饒鉉

聞角

漏歇銅壺畫角催嚴霜飛動曙雲開吹殘孤嶂一輪月
落盡寒城幾樹梅遠塞征衣愁未寄小樓客枕夢初回
誰將鐵笛三更弄驚舞魚龍亦壯哉

汪潯雷

次潘季通遷居韻

萬竹蒼蒼今已非，古梅猶有歲寒枝。
橋分野色春還好，門對嵐光晚更宜。
茶竈正須黃葉煮，琴床已帶白雲移。
題詩莫厭催租吏，鍾鼎山林各有為。

賀陳公輔遷居

原注：公輔買屋得新樓甚喜。

大隱何常厭市閭，新遷端為好樓居。
坐來疊嶂雲生麓，住近雙溪客有魚。
二頃可供投轄飲，五車爭羨載行書。

門前怕有西臺使未許興公賦遂初

胡祺

崇祺字壽卿
繁昌教諭

送憲使李正卿移節江陵

原注時
有賜酒

山立長身氣凜然使君元是錦袍仙
星移玉節臨三楚露貯冰壺下九天
碧樹渚宮秋色老甘棠南紀晝陰連
姓名已報金甌覆早作商霖遍八埏

潘登雲

讀蜀志有感

孔明廟栢蠶叢國先主樓桑涿鹿州魚水交情千載遇
風煙老樹幾回秋魂飛故宇家何許志在中原死未休
漢祚合歸真帝胄如何天不祚炎劉

荀原道

端午懷屈原曹娥

端陽詞客感遺蹤碧艾青蒲顫曉風湘水越江風土異
忠臣孝女古今同千年往事人何在五月滄波恨不窮
漢史楚騷繡閣處忍斟醺醖對榴紅

寄熊平憲

長憶春初一笑逢春懷無便寄書筒餘波解洗徐凝惡
末路應憐阮籍窮栗里歸來儲粟少夔州以後作詩工
樽前底用悲秋苦滿目西疇穉事豐

次銅陵何景華賦歸韻

何遜重來經幾載新詩繾綣惜臨分厭聽疊嶂樓前雨
催拂五松山畔雲歸興故園培菊本閒情春浦入鷗羣
為言擬葺昌黎藁早寄東風慰望勤

吳復興

壽吳子彥

獨步詞華起縉紳
西江夢澤簡書頻
文淵去國常思弟
潘岳閒居只為親
香遠亭前荷葉老
歲寒座上栢枝新
當年祖笏分明在
滿眼孫劉總後塵

高德游

送余三軒赴廣西廉訪副使

丹宸皇皇遣使華
烏臺馳傳趣齊瓜
繡衣直指三千里

絲轡周詢百萬家
境內風生無毒草
嶺頭春早有梅花
蕃宣允作南邦式
補袞遄歸寵遇加

挽王永叔

脩然山澤一癯仙
坐閱人間九十年
衛武詩成應自儆
伏生書在可相傳
藻芹春暖香逾遠
松栢年深操愈堅
有子七旬頭亦白
森森蘭玉滿堦前

欽定四庫全書

集部

宛陵羣英集卷十二

詳校官通政使_臣夢吉

助教_臣常循覆勘

謄錄舉人_臣黃道暉

謄錄監生_臣單可莊

謄錄貢生_臣章松雲

欽定四庫全書

宛陵羣英集卷十

元汪澤民張師愚同編

今體

七言律

元

施震仲

寄朱理甫

別後誰憐久索居寄書長恨便鴻無青山招隱思佳士
白髮催人惜壯圖休羨羊何臨海嶠願如朱陸會鵝湖

肯來邂逅成清話不用邯鄲滿眼酤

原註理甫不嗜酒

趙由墩

餞孔常軒館木塔寺

東魯宣尼幾世孫春風吹上育王城
葛藤已許參獅窟竹簡何妨挾兔園
一變悠悠驚世夢久晴脉脉落溪痕
長年來往城中路木塔相尋莫憚煩

趙由偏

送汪叔志入京會試

奎宿韜屨四十年喜頌新詔又求賢閒門養拙慚吾老
上國觀光屬子先兩袖秋香攀桂月九重春宴看花天
男兒自有冲霄志萬里亨衢快着鞭

董天吉

壽齊諾監司

綠鬢貂蟬合殿中輜車又過大江東九重行侍君王燕
五度曾乘御史驄好學襟懷開霽月愛民心事藹春風
夜深香火聽輿誦好是稱觴壽母同

寄題戴帥初岩堯亭

道家冠服出風塵且為岩堯作主人座上好山青對起
門前流水綠橫陳閒情倦翼凝情迥酒盞棋枰發興新
千里情交都在眼與亭相遠似相鄰

送侍其總管任浙東廉使二首

曾聞鼻祖牧宣州又見邦人誦我侯世閱雙旌相約映
人生五馬自風流西偏清嘯獨孤觀北望高吟小謝樓
此去驂騑諳舊路定知原隰望咨諏

畫戟凝香禮數殊敢勤屣履下庸愚有時小隊尋花柳
也枉前茅到竹梧

原註董有竹梧亭

對客每曾蒙齒錄問年直

恐混泥途使君早晚朝天闕還念滄江釣叟無

王經國

按宛雅作繼國

上高總管勸農二首

福星臨耀野人家竹馬紅旗夾道遮相對老農分茗菓
更呼收豎問桑麻前茅喜氣占鳴鵲嘉穀豐年卜吠蛙
何似使君心感召豚蹄休更祝汙邪

朱旗雕騎使君來踏碎柴關一徑苔
細說桑麻情繾綣肯披荆棘陟崔嵬
持豚笑聽穰田頌薦鮪香酣祭社杯
最好啼鶯飛鷺處水光山色共徘徊

孫煥文

賀那僉事除學士

皇華江左遍咨詢又趣行裝覲紫宸
玉笋聯班新學士金蓮賜炬舊詞臣
天開熙洽生時彥地占深巖隔世塵
聖代崇文千載遇好將儒術展經綸

送汪叔志赴京會試

鄉曲羣英推獨步春秋與學信淵源鵬程擊水三千里
鳳詔興賢第一番蘭省芳名題淡墨玉階大對吐忠言
青氈光復慈顏喜又報松林出狀元

送汪叔志之岳州路平江州同

鄉閭兩薦收科第喜奉潘輿遠宦遊直上雲霄初發軔
平分風月暫為州岳陽仙迹詢遺老湖右儒林接勝流
內翰垂芳應百世青氈行復黼皇猷

陶景威

示朱氏表姪兄弟

少壯馳驅意氣豪，曾從甥館接時髦。
故家文獻逢聯璧，弈世衣冠嘆二毛。
正爾管寧甘白帽，不應范叔戀緋袍。
山中回首皆陳迹，痛飲惟須讀楚騷。

次趙松壑贈別韻

銷聲息影寄巖阿，已分衰遲井不波。
陶令田園祇自種，翟公門戶竟誰過。
帆開江上碧雲合，愁滿堦前紅葉多。

莫謂長才終逆旅會將經濟佐常何

張思濂

贈軒轅道士

子是彌明幾代孫姓名乃使世人聞坐驚星斗生雷劍
行覺烟霞繞練裙月裏白鸞招子晉山前青虎借茅君
長春酒熟朝朝醉高枕瑤琴卧綠雲

次韻江鍊師

道人容貌似嬰孩手扶天罡步斗魁挂杖神遊却月觀

凌風夜上鍊丹臺
劍橫秋水蒼龍化
夜染春雲玉女裁
聞道蓬萊隔東海
芙蓉三朶翠成堆

戲贈報恩觀道士

絳綃法服碧雲冠
玉磬金鐘每夜闌
壇上步虛黃籙醮
箕邊懸筆紫姑巖
甲丁並走妖精碎
雷電雙飛雨氣寒
莫訝先生耽酒肉
杭人誰識爛頭潘

原註潘守元字無涯臨平景星觀提

點善
雷法

丁繼道

贈都門道士欽雲深

大隱從來傍市塵五雲深處有神仙金丹九轉地靈泣
鐵笛一聲山月圓無事焚香消白日有時騎鶴上青天
自今了却塵寰債借我松牕半榻眠

丙子春自閩海進柑至信州沙溪驛遇天師真
人朝京遂賦此以上之

鸞駢鳳輦出蓬萊虎窟龍湫到處開四海鬼神符役走
九天雷電劒驅來玄袍香惹黃金殿御酒光搖白玉杯

喜動龍顏承厚渥春風萬里寶車回

送汪必大尊師歸龍虎山

鹿裘偏耐莫春寒船上桐江雨脚乾袖裏風雷三尺劍
胸中子午一丸丹騎龍飛去人應易化鶴歸來事不難
見說鄉溪舊仙院白雲終日護松關

王彝

濟川橋成美貳郡

貳郡下車憂病涉彩虹依舊壯宣城向來對面風波隔

今日驅車祗席行秋水魚龍驚卧影中天星斗簇飛甍
他年四海皆康濟應許孤舟野渡橫

李至善

病起懷家山之久別兄弟之睽離即事偶成

晚望荒城重感嗟十年行客倦思家渚田稻薄無來鴈
庭樹枝寒少宿鴉書為在官長廢讀酒因多病久停賒
何時日暖尋初約同探疎梅著幾花

和吳閒閒送張玄谷詩韻

得道長生學賀玄
足然空谷足音傳
六龍朝罷香盈袖
獨鶴歸來月滿天
葉玩山中仙子篆
書藏圮上老人編
玉章繡句吳門贈
好刻琅玕紀歲年

孫叔遠

送監憲丁太初除內省參議

天錫殊恩下帝京
繡衣催換錦衣榮
臯夔事業醅初志
堯舜君民在此行
白玉堂前春色早
紫薇花外漏聲清
人材從此宜收拾
同與皇家致太平

送楊推官滿任

今代楊君政可師
陰功多在洗冤時
唐朝文藻誇三喜
漢吏清廉說四知
詩句精神池草夢
雨聲消息杏花枝
江東殿最還公論
好為條陳對玉墀

孫彛

送侍其總管之浙東廉使

風度當今第一流
幾年五馬踏南州
紫泥香動九重詔
繡斧光搖八詠樓
父老自憐難借寇
書生猶恨失依劉

越山重見水霜厲棠蔭龜城春在不

貢瑜

挽仲章叔父

齊山發軔已馳名金馬門深屬老成蓮燭幾回供御直
棘闌三度掌文衡築亭奉母人間樂飲水居官物外情
從此竹林無舊賞臨風揮淚憶平生

奚繼學

挽趙陽山生辭

人生大夢誰能覺
衆醉昏昏公獨醒
半世虛名秋鬢白
一編寶錄夜燈青
達觀共閱生前傳
諛墓何庸身後銘
未問蓋棺并荷插
相逢一笑且忘形

貢松

挽劉文甫

地連桑梓重懷思
逝水東流不盡時
古月今人安得共
晨星霜木俱堪悲
昔遊未結蘭金友
既往空嗟薤露辭
我亦衰遲增感慨
青山白石映鬚眉

馮嘉

送汪叔志入京會試

綠髮儒林久著聲
承家經術自簪纓
車書萬里開文運
天地一番生俊英
已喜秋風蜚鶚薦
更看雲路奮鵬程
九重對罷臨軒策
歸拜慈闈祿養榮

潘俞

題存悔老人後傳

北風不貸綠荷衣
三十年來甲子詩
公族尚存麟趾意

故都空寄黍離悲
篋中有筆遺家傳
身後無金買墓碑
惆悵斯人滯空谷
紛紛餘子坐臯比

次劉宗臣表兄生日韻

綠楊巷陌久分陰
衰病如今雪半侵
舉世劇為雲雨手
愛君獨有弟兄心
螢牕雪案多雄辯
月榭風櫺幾醉吟
壽席一盃無事酒
畸人多謝費招尋

阮麟翁

次耿參政韻

雲耕月釣老書生
曾玷朝班錄姓名
萬里驅馳瞻魏闕
一官落拓守江城
鵬搏北海風斯下
鵲遶南枝月正明
百尺竿頭容進步
筆端轉處即欣榮

梅實

送董憲使

金甌玉鉉舊家聲
使節南來此按臨
家有春秋三對策
囊無暮夜四知金
東風忽動歸田興
今日難忘卧轍心
蔽芾甘棠休剪伐
江東父老去思深

戴芳

送廉使傅公

持節江東又四年一襟風月浩無邊
神馳華嶽三千里身到長安尺五天
客路黃花明白髮別筵綠醕照金船
從茲早慰蒼生望便合為霖復舊漣

張志合

送楊長卿之任贛州路知事

千里名藩江右郡軍民伉健俗還淳
紅蓮綠水逢佳士

白酒黃雞別故人
贛石連灘攢劒戟
廉泉一勺洗埃塵
辭金素有風霜操
贊酒行施雨露春

附七言律詩

按永樂大典內凡係失
名失題無考者附後

喜雨

兵戈饑疫苦相仍
天亦愁聞痛哭聲
好雨知時隨地足
餘民恐死待秋成
已蘇園圃嘉生茂
更洗閭閻厲氣清
力挽天河須壯士
瓣香萬壽祝皇明

送馬伯庸學士赴上都

人間六月沸炎波上國清涼樂事多視草舊傳真學士
散花新起病維摩千年結友心相似萬里辭家意若何
料想勝遊偏得句秋風先寄鴈南過

許丞仲遠白首選調而詩益工不鄙余謂可教
數以授之區區雖知愛尚顧無相為薦達因竊
感慨賦此兩章非徒以慰藉仲遠而已也亦風
諸有力者使動心焉

每誦君詩輒會心悠然野雪想山陰古風已轉清平調

俗學寧論正始音
執戟草玄勞行測
參謀垂白慣浮湛
何人與布咸陽市
相國猶能字十金

杯酒相尋二十年
故交零落半新阡
揚眉結義滔滔是
袖手觀詩往往然
不恨菰葦漂甫里
所憐槐竹老藍田
須公更和三高賦
會有吹噓達九天

題廬山上花成寺

樓臺高聳入中天
壓破寒山數畝烟
永日松欄幽鳥語
半空巖石老僧禪
牕臨樛木排深澗
簷拂長蘿下翠顛

野客每來何所得一聲秋磬似相便

杜善甫母年八十索詩

杜羔至行尚流聲又見聞孫繼美名永日忘憂萱草長
春風送喜板輿輕何妨靡盬從王事細說平反慰物情
聖代只今隆孝理會開湯沐侈恩榮

歸自杭城周千之以詩見贈次韻

柳岸清遊逐舞塵歸來猶憶六橋春湖波瀲灩揚舠穩
山徑委蛇得句新怪石生來懸象鼻神魚飛出現龍身

原註是日探烟霞摩象鼻游玉泉觀飛魚心知綽約溪濱女不是桃花洞裏

人

讀項羽傳

逐鹿中原志未酬
息兵暫擬割鴻溝
重瞳似舜終何益
三戶亡嬴讖亦休
江左豈無秦父老
關中已屬漢諸侯
萬人一劍都無用
怕見虞姬地下羞

尋陽舟中與王元舉別

飛佩衡湘萬里游
相逢奇士集仙舟
缺壺歌斷心猶壯

刻燭詩成老更遒
幕府豈能淹驥足
文章自可占鰲頭
平生湖海輕餘子
好卧元龍百尺樓

題宋梅洞獻書圖

十年送別今同客
一笑談詩重起予
周禮盛聞殷士裸
漢庭喜見伏生書
青燈較藝飛蛾集
白髮離家過鴈疎
塚壁殘文如可續
百篇應許論虞初

元處士自洛歸宛陵山居見示詹事相公餞行之什因贈

紫霄峯下絕韋編舊隱相知結戰前

原註元君舊隱廬山學易常為相國

師服

月落尚留東閣醉風高還憶北牕眠江城夜別蕭蕭

雨山檻晴歸漠漠烟一頃豆花三頃竹想應拋却釣魚船

汪希聲書堂作

衡簷睥睨壓疎櫺平割黃山一半青落日捲雲隨鶻沒
黑風吹雨帶龍腥人間軒冕駒閑皂身外乾坤水載萍
我正江湖子林壑客星未減少微星

四月九日新霽景氣清淑偕宗英公仲自天都
峯側遊湯泉道中偶成

天都巖出諸峯上曙色嵐開逸興催半壁暗泉吹冷雨
懸崖飛瀑吼晴雷白雲縹緲仙鄉近碧落高寒俗駕迴
自笑平生愛清境冥搜不厭歷崔嵬

番禺區善叔奉憲司命買書江浙間將以實之
郡學尊經閣其部使者之賢益可知矣區君過
宣城賦詩送之

有客衣冠萬里行收書捧檄過昭亭士行運甓逢州牧
區冊拏舟自海溟插架懸籤空蠹帙還珠買積豈通經
天生才質無遐邇會有鴻儒動漢庭

病中言懷

原註 辛未
七月晦日

一卧烟霞十五秋青雲事業付滄洲吞江久病相如渴
報國空懷杜老憂花院竹亭宜鶴氅藥囊書卷是菟裘
毒蛇未悟杯中影灑翰聊成物外遊

挽吾夫人汪氏

鶴髮承顏有寧馨久知孟母著儀刑恩封真配二千石
眉壽將高八十齡烏哺林寒驚往夢牛眠地古勒新銘
由來積善徵餘慶蘭玉森然正滿庭

和韓庭玉早發蕪湖韻

水驛嚴程下急湍此行王事正相干帆開萬里煙波濶
衣帶半天星斗寒道路從來愁客子詩書元不誤儒冠
誰憐老我昭亭麓一樹梅花竹數竿

陳使君席上

舍人退食倦清班
勇往州麾去莫攀
醪酒舞裾歌扇外
携賓茅舍竹籬間
綠田灩灩春耕早
畫戟森森畫衛閒
盡遣孤雲霈豐澤
不應多羨敬亭山

賀除左史

容臺左職未多時
便結絲綯立左螭
我亦自慚三黜後
人皆見謂十年遲
躋攀寸步今如許
咫尺清光喜可知
已是玉皇香案吏
願輸忠赤罄論思

挽貢仲堅

東海揚塵憶釣鼃北亭恩澤眷時髦武林講學春風暖
彭澤移封晚節高華萼聯榮端象笏芝蘭出色映緋袍
蓬萊夢斷清名在哀些空嗟里有蒿

雙頭同心芍藥出西城居民家

雙花窈窕照春深盡日凭闌費苦吟背面紫雲分寶髻
合歡金縷結同心歌殘溱洧休相贈瑞出維揚可重尋
共向東風承雨露不辭玉砌與山林

挽葉承事

雨露重新下九天聖明知有子孫賢山林事業陶弘景
詩酒襟懷孟浩然化鶴不驚來此客狎鷗相值憶當年
一邱一壑委蛇地寥落風煙黯逝川

挽郭僉事

壯志亨衢早亢宗聲華藉甚播諸公花封春暖曾馴雉
柏府霜清共避驄正爾使輶勞問俗忽驚仙珮去乘風
故鄉歸葬三千里目斷銘旌獵獵紅

失題

六朝宮闕鎖黃埃王謝諸賢喚不回半世江湖成老去
滿天風雨挾愁來倚門夢寐家千里逆旅情懷酒一杯
終有林塘歸舊隱寄言鷗鷺莫相猜

欽定四庫全書

宛陵羣英集卷十一 元汪澤民張師愚同編

今體 五言排律

宋

陳天麟

送太守李公

亂花翻陣雨飛絮轉輕毬別思昏如醉征鞍挽不留職
循今列郡秩視古諸侯當代人多仰惟公政最優洋川

佳景物勝跡舊經遊未定中原擾猶懷傍塞憂九重爰
錫命千里藉承流德遂祥雲偃恩隨瑞靄浮帶刀還隴
畝挾纊動貌貅烽柝開邊月犁鋤慶麥秋二天舒士氣
五袴沸民謳虞氏三年考河南第一州霜臺方薦墨黼
座想凝旒早晚頒綸綍東西走置郵遲遲姑去魯几几
定歸周明月湖光遠凌雲氣象幽煙波浮畫鷁雪浪遶
烏牛好逐桃花漲輕飛竹葉舟徑歸調玉鉉莫待覆金
甌賤吏傷萍梗終年仰庇休龍門曾御李驥坂曾依劉

不作癡兒女孜孜話別愁

元

王圭

送汪叔志赴省試

纔撤秋闈棘香名動地傳初無三獻事竟作一鳴先抱
獨遺經在妍精坐席穿品題歸月旦徒步起菑川秀擢
江南日羣空冀北年倚門占鵲喜同社羨鵬騫聖代方
尊士諸公急薦賢修程須努力莫後祖生鞭

王璋

濟川橋成

二水玄暉郡雙谿太白詩江山遺跡在惠政大賢知
石砌湍瀨飛梁跨渚涯仙宮鰲顙星漢鵲參差不礙
乘槎客翻愁踏浪兒人從衽席過功類鬼神為利涉通
千里懽呼共一辭吟詩欲題柱記取落成時

送傅擴齋廉訪滿秩歸長安二十韻

南國黃華使東維列宿光選輪應近侍駸歷且殊方地

鎮江陵重天連蜀道長班荆非客宦負弩盛朝章問俗
魚鳧國傳盃杞梓堂舞看渝水曲歌倩竹枝娘叔子心
期遠文翁政術良巡巡持漢節處處即桐鄉瑤厯更新
號崇臺整舊綱玉驄鳴宛水軒鶴憩陵陽落筆霜威重
隨車雨氣涼澤中集鴻雁道上屏豺狼舉措消羣枉封
培惜衆芳春回魯宮藻陰滿召公棠有客棲南郭無人
薦蜀莊分庭寬禮數退食問行藏古道今安有深心矢
不忘方欣為李御遄報促曹裝送客聽雞唱征帆拂雁

行楚江楓葉赤陶宅菊華黃未就長安第還分漢署香
他年懷舊德悵望繡衣裳

何儒行

泮宮丁祀二十四韻

禮樂皇元盛文章孔道昌垂旒尊視帝居扆面當陽冠
帶三千子衣裳十二章四公傳道統十哲領儒綱離火
丁初吉春秋仲月良羣侯霑教雨憲使凜清霜光赫開
宮殿聲明發庠序衆官朱紫列多士佩衿翔庭燎東西

廡軒縣上下堂糾彈觀儼肅贊引步趨蹌濟濟咸端笏
我我或奉璋鸞刀毛啓血龍勺酒流黃燃燭紅輝合薰
爐紫霧颺豆籩分左右簋簋辨圓方腥熟牲殊體浮沉
齊並香告神詞具祝奠爵幣承筐玉振笙鏞間歌登雅
頌揚九成音律洽三獻色容莊隆殺儀如式尊卑序有
常聚精誠有感錫胙福無疆剡剡疑來假洋洋若在傍
廟陰聞瘞坎門外散班行湛露丹墀曙清風泮水涼斯
文垂令典日月與天長

梅實

送王繼學廉使

天地開元運山川毓俊良
皇猷資黼黻令德著珪璋
列位登台鼎垂紳佐廟廊
設施崇禮樂出處繫綱常
報國心能赤憂民鬢已蒼
存誠常懇懇求道亦皇皇
不向炎荒去誰知姓字香
蘇公往儋耳韓子適潮陽
歸旆輕車熟還朝
晝錦光錫恩承雨露出使領風霜
儀鳳朝仍見妖狐夜亦藏
七州煩勞來六轡快騰驤
暇日宣城郡春

風宛水堂坐邀山淡淡卧聽雨浪浪惜別詩成軸興懷
酒滿觴攀援留莫住九萬志難量願早登樞要為霖遍
八荒

附聯句二首

張師愚

大德八年六月既望余與汪叔志梅叔威及叔

與弟栢山寺納涼聯句

雲林近南郭瀟灑共追涼青稻花凝雪

仲淵

新篁節傳霜

幽尋過紺宇

叔志

高坐得虛堂僧供來山茗

叔威

賓筵列翠

觴桃如尼父雪

叔興

爪為邵平嘗覓句題蕉葉

仲淵

圍碁到

竹房割雞勝異味

叔志

貳戡列羶薌風入纖絺爽

叔威

陰移

白砌長塵龕金像暗

叔興

柏壘石麟亡鈴語朱樓迴

仲淵

輪

摧白塔荒題名漫素壁

叔志

殘碣卧修廊綠愛垂垣草

叔威

黃炊入夢梁嘯歌游物外

叔興

山水樂吾鄉學道期顏閔

仲淵論交有范張總無簪帶累

叔志

未覺歲時忙盤谷思同

隱

叔威

濠梁意兩忘荷衣元解製

叔興

星劍但深藏入室芝

蘭秀

仲淵

聯輝棣萼芳短才慚附驥

叔志

高詠笑啼螭俛仰

懷吾祖

叔威

空山自夕陽

叔興

城東晚步聯句

餘酣尋晚逕覓句費幽思戴笠身歸寺

仲淵

持旂鬼護祠

渚萍霜後紫

叔志

野菊雨前衰緩步忘歸去

叔興

茲游豈有

期

仲淵

今體

五言絕句

元

王圭

題毗陵於生藕花蓮房

藕絲一何長蓮柄一何短
應似懷遠人愁多寸心斷
離離秋蓮實采之贈所思
香葉不成圓苦心自知

王璋

折枝月桂

月樹漫同名春風偏自知
姮娥空老去未識此花枝
題錢劉兩御史家藏熙寧爭新法諫疏卷末

忠言雖不售百里仰高風為問臺中妙何人繼兩公
稷契功安在申商術亦疎虛名誤人國介甫讀何書

汪銖

畫蓮

捲綠新如染酣紅睡未醒真疑貯風露不似出丹青

張師愚

檜柏同本

圃人植雙樹枝葉翠相繚遂使真心合歲寒託綢繆

張師魯

留山中

倚澗惜魚逝升丘送鴻歸遙林暮色至漠漠上人衣

西嶼

揚舲渡湖西孤興得幽討水木澹秋陰天風一揮掃

山齋

移石列蒼峭生成喬嶽勢開軒對此山渾識太古意

蒙軒

流水度竹間未知何所適此時當自謀會見通潮汐

濯清

濁水豈能染亭亭風度閒迺知君子愛不在顏色間

聽雨舫

雨侵金版舫釜豆裂清響不滴離人愁誰來伴孤賞

採菱舟

舟人弭蘭棹采采供菱黃我意豈在物以助心清涼

汪澤民

金陵別友

烟草六朝夢鶯花三月游秦淮風雨夜楚客別離愁

汪天驥

案天驥字樂全涇人為元妙觀道士能詩

夏日閒行

偶爾行行去山家半掩扉暫來松下立苔色上人衣

蕭澥

原註金精山民

戍婦詞

不恨妾空閨只恨郎飄泊夜月卧沙場誰道從軍樂

附五言絕句

按永樂大典內凡係失名失題無考者附後

詠歸橋

橋邊絮紛紛橋下水渙渙長吟度春風千載還一旦

南阜

萬象布幽遐因高窮所詣誰云南阜小獨勝在平地

鹿山獸也亦受羈於人

毛毳明雪花茸生削紅玉頻頻時一鳴山中豐草綠
野性不自適無緣脫羈囚誰懷嘉賓樂感爾空呦呦

春日雜詠

門前春水滑柳外夕陽斜欲識春風面滿城紅白花

失題

谷溜滴雲根垂垂自何至隔竹聽琮琤令人起清思

六言絕句

元

何儒行

春日

碧桃花開漢苑紫簫聲斷秦樓風暖馬嘶金勒月明人
上簾鉤

花落鶯翻紅雨峯回鷺點青嵐人別春前春後草迷江
北江南

江上潮生潮落山中花謝花開生計綠蓑青笠閒情白
石蒼苔

--	--	--	--	--	--	--	--

欽定四庫全書

宛陵羣英集卷十二 元汪澤民張師愚同編

今體七言絕句

宋

周紫芝

紫芝字少隱年六十一始以廷對第三人出身歷右司員外郎知興國軍秩滿奉

祠歸入廬山終焉所著有太倉稊米集竹坡詞竹坡詩話楚詞贊說等若干卷

宿秋霜閣後方丈

秋霜落後題詩處醉墨淋漓苦未乾不見窮愁孟東野

亂峯空鎖一溪寒

李宏

宿秋霜閣方丈

青山天矯蚪龍蟠
溪流瀉竭灘聲乾
履霜未落秋尚早
夜半已作貂裘寒

吳潛

京解即事

春陰漠漠護輕寒
春晝無聊午夢闌
幽鳥不知人意改

銜花飛傍小闌干

陪陳立道中書泛湖

幽幽池館鎖蒼苔
萬朵芙蓉取次開
却似昭陽舊宮女
含嬌只待翠華來

絃管叢中畫舫行
都人一一荷昇平
飛鴻不識人間事
猶帶窮邊腸斷聲

元

王圭

劉有之還京口簡梁中砥知宮

為謝詩家塵外人別來消息斷無聞如何占得三峯住
不寄山中一片雲

王璋

題三笑圖

白社風流二士俱過溪沽酒總緣渠偶然一笑初無意
又落人間作畫圖

汪鑫

戍婦詞

兩地魂消萬里愁
君猶荒戍妾空樓
去時拋棄無情鏡
留與歸人照白頭

象尺金刀對玉缸
團花裁破鷓鴣雙
沙場爭信深閨夜
忍淚縫衣月半牕

嬋娟霜月照荒垣
妾擁重衾尚怯單
況是玉門關外雪
夜深沙漠鐵衣寒

塞邊無雁可傳書
門外無山可望夫
獨有柳營千里月

素娥深夜伴人孤

胡寬

和仲章艤舟陵州橋下韻

高柳黃鸝喚晝眠
陵州城外御河邊
遙遙雲霧蒼龍闕
汎汎波濤彩鷁船

陶應雷

辛未六月盛暑中過翼然亭小寐

拂枕松風卧翼然
夢回那信是炎天
泉聲只在桃花下

一似廬山聽雨眠

長門怨十二首

拜月香殘獨掩扉
玉階風葉斷腸時
羊車知又向何處
空自將鹽灑竹枝

擬摘梅花貼鬢嬌
未曾掠削早無聊
承恩不似金盤雪
得到龍屏暖處消

慚問金輿過鳳池
綠雲斜軀曉粧遲
試陪杏苑尋雙藥
暗卜東皇屬阿誰

水殿風生暑氣微
翠娥新寵實忘歸
誰知寂寞朱簾裏
卧聽笙歌半掩扉

玉街月映水晶宮
何日承恩浥露濃
天上佳期猶有準
一年一度定相逢

沉香亭畔百花開
知是君王宴賞來
遙聽簫韶聲九奏
何時得奉萬年杯

垂柳陰陰正日長
波澄太液午風涼
應知避暑披香殿
薄命無由侍玉皇

寶殿傳呼宴鳳樓一天明月桂花秋此時誰舞霓裳曲
寂寞深宮祇自愁

飛瓊冷入畫簷深龍麝重重熏翡翠衾手撚梅花腸欲斷
不辭買賦費千金

脉脉無言傍鏡臺曉粧應妬小桃腮自憐不及雙飛燕
幾入昭陽深處回

風度荷花小殿香淺沙依舊浴鴛鴦御書翠扇恩猶在
偏憶金輿夜納涼

仙桂花開月漸明
惱人心碎是蛩聲
不禁枕畔梧桐落
欲夢君王夢不成

汪珍

故鄉

林缺朝陽射屋櫺
小牕清露滴芭蕉
無端喚覺鄉園夢
竹外一聲婆餅焦

龍吟寺前鐵石岸偕寺僧携酒泛舟

青山漠漠水天平
想見江天入眼明
借我扁舟潭上宿

卧聽疎雨打蓬聲

遊無為庵

竹埤杉垣記昔遊
洞門花落石床幽
白雲飛盡四山碧
黃鶴一聲天地秋

陵陽歌

陵陽城頭落日黃
陵陽城下水茫茫
樓中少婦吹羌笛
時有征人思故鄉

墨梅

三更四更霜壓屋一枝二枝風折竹江南歲晚客未歸
夢入溪烟小橫幅

何致中

山居暮春

苦棟吹香柳絮飛杜鵑聲裏夕陽微惜花誰唱留春曲
花雨滿簾春自歸

張師愚

游彰教寺

春風延客為開關
天雨空花紫翠間
欲向雲中問鷄犬
蒼蒼松柏暗丁山

葉縣鳬飛杳莫尋
河陽桃李失春陰
空餘馬鬣遺封在
天祿閒眠碧草深

吳琳

按琳丞相潛次子嘗討台州賊楊鎮龍有功陞江東招討使司鎮金陵

農家

野火相連打麥田
仰看斗轉月低弦
古來但說農家樂
夜半誰知未得眠

汪澤民

題子昂畫馬圖

千里龍媒瑞世間
拳毛如雪汗溝殷
飛騰不待韓生畫
自是當年十二閑

黃河道中

寶林溪水碧於藍
石竹庭柯黛色參
落盡梨花寒食過
幾回歸夢繞江南

晚渡桃源日未西
綠陰村巷轉逶迤
菜花籬落飛黃蝶

恰似南園雨霽時

二月十日同諸彥游彰教寺

秋來遊興日相關
帶雨看花紫翠間
閒讀唐碑訪陳迹
石麟殘缺卧丁山

施琪

雙溪舟行

扁舟鼓枻下灘來
驚起沙鷗去復回
我是江湖風月友
忘機來往不須猜

吳鏌

丁巳立春

笑看風景異鄉春
綠筆題詩發興新
遙想椒花堂上酒
醉時頻說未歸人

汪天驥

次暮春韻

為愛雲林綠錦苔
柴門花落畫慵開
竹牀讀罷南華卷
蝶夢蘧蘧枕上來

春暮戲滄州

扶醉相思日又斜
茅齋門外即天涯
先生不出渾閒事
凍却東園幾度花

王鰲叟

題秋江獨釣圖

一葉煙波渺渺間
此身常與白鷗閑
秋江落日收緡盡
獨坐船頭看遠山

高德壽

失題

蘭溪雪消江水來
蘭溪日落舟人催
問郎今夜南海去
煙波萬里何時回

林方

戍婦詞

九月嚴霜塞下飛
連營回首望寒衣
將軍縱上移屯奏
無奈公卿半是非

張思濂

題關尹問道圖

關門令尹苦紛紛道德胡為問老君
柱史習知周制度不詢殘缺補經文

送道士

春雲染濕紫煙衣青山萬重黃鶴飛
蓬萊遠在弱水外何日歸來丁令威

丁繼道

題汪宗文住南山道院詩卷

竹杖花瓢自往還無人識得老樵顏
謫仙相訪不相見惆悵題詩下碧山

歸隱南山第一巔樵仙跨鶴去多年
琅函秘訣雲深鎖留待君來手自傳

孫彞

競渡

紅錦高標蓮葉浦綵龍飛處捷如神
此時標下爭先客正似權門觸熱人

蕭解

商婦怨

騎馬出門踰兩年知君鞭算地流錢
可憐兒小誰耕種荒却原頭一半田

李膺叔

餞張叔禮

離亭飲酒匆匆別迴首西山日掛巖
駐馬長堤攀古柳北風吹淚濕征衫

王元粹

夏日雜興二首

綠槐夾道午陰濃
閒坐開襟喜受風
天際黑雲何處雨
孤村却在夕陽中

寂寂閒齋晝掩扉
苔華草色暗侵衣
忽然一陣西來雨
捲起疎簾放燕歸

附七言絕句

按永樂大典內凡係失
名失題無考者附後

寄題漁隱無風波處

漁家元自有風波無處遙應樂更多
晚歲捲簾看雪坐
笑渠江上冷披蓑

春日

東風破寒入幽谷殘雪消時燒痕綠
林花鬪日媚于頰
野蕨登盤甘勝肉

南漪新淥晴滿湖春來行樂何處無
一樽我欲就花飲
花下啼禽能勸沽

又酬友人春日見寄韻

蕪蕪菲菲委地紅闌干不解隔狂風詩人莫道尋芳晚
留得餘春綠樹中

清景行行一徑苔蘭樽特為晚春開綠陰青子猶堪賞
昨日遊人自不來

又和戴剡源春日雜題

天寒游子怯春衣夜夜高堂只夢歸回首敬亭山下路
東風千里白雲飛

庭中紅葉

霜葉紅腴錦不如隨風零落下庭除
丁寧莫遣兒童掃
留與幽人自學書

御河夜宿聞吳歌

江聲拍枕觸聲齊霜滿蓬牕月半低
卧聽吳歌度村渚
恍然身在浙江西

白景宣憲僉來江東翰林李士弘作墨竹以贈
題其後云貢仲章王氏兄弟不可無詩白公以
見示因題卷末

冰梢偃蹇出林叢
照眼炎雲一洗空
持贈綉衣知有意
好將南國作清風

酬寄葉梅邊

無意談經向石渠
却來湖上結茅廬
閉門不作紅塵夢
自把山中甲子書

深夜

青缸有恨月同孤
小閣無人雪擁爐
貪睡梅花渾不醒
一聲鄰笛為驚呼

丈室散花天亦久何曾破滅有花痕但教魔女分燈去
未是毗耶不二門

漁父歌

船頭唱歌船尾和柳眼含春青未破溪水潮來長半篙
應是前村山雨大

秋江古木

作棟何慙汗萬牛文章不露幾經秋未應江北江南岸
長為漁翁繫釣舟

夢歸

明滅孤燈照寂寥
歸心無奈轉迢迢
青山不隔思親夢
昨夜曾過九里橋

乾
道
庚
子
山
原